

**Pravilnik
o izmjenama i dopunama Pravilnika o
nabavkama**

Sarajevo, septembar 2025. godine

Na osnovu člana 81. stava (1) tačke d) Statuta Dioničkog društva BH Telecom Sarajevo, broj: 00.1-03-31535/23-9 od 22.12.2023. godine, Uprava Društva na **86. sjednici** održanoj dana 24.09.2025. godine, donosi

PRAVILNIK O IZMJENAMA I DOPUNAMA PRAVILNIKA O NABAVKAMA

Član 1.

- (1) U Pravilniku o nabavkama broj: 00.1-14-30750/22-4 i 00.1-14113028/24-1 u članu 4. iza stava (4) dodaje se novi stav (5) koji glasi: „(5) Ponuđač prilikom dostavljanja ponude i prihvatanja uslova tenderske dokumentacije prihvata i saglasan je sa odredbama Kodeksa ponašanja dobavljača, koji je javno objavljen na web portalu BH Telecoma. Navedena odredba se obavezno unosi u TD.“ Dosadašnji stavovi od (5) do (10) postaju stavovi (6) do (11), respektivno.
- (2) U članu 4. stavu (6) brišu se riječi: „uz Kodeks ponašanja dobavljača“.

Član 2.

- (1) U članu 7. Pravilnika dosadašnji stav (4) se mijenja i sad glasi: „ (4) BH Telecom preduzima odgovarajuće mjere kako bi efikasno spriječio, prepoznao i uklonio sukobe interesa u vezi sa postupkom nabavke, a radi izbjegavanja narušavanja tržišnog takmičenja i osiguranja jednakog postupanja prema svim privrednim subjektima..
- (2) U članu 7. iza stava (4) dodadju se novi stavovi od (5) do (14) koji glase:“
 - (5) Sukob interesa između BH Telecoma i privrednog subjekta obuhvata situacije kada predstavnici BH Telecoma, koji su uključeni u sprovođenje postupka nabavke ili mogu uticati na rezultat tog postupka, imaju, direktno ili indirektno, finansijski, privredni ili bilo koji drugi lični interes koji bi se mogao smatrati štetnim za njihovu nepristranost i nezavisnost u okviru postupka, a naročito:
 - a) ako predstavnik BH Telecoma istovremeno obavlja upravljačke poslove u privrednom subjektu, ili
 - b) ako je predstavnik BH Telecoma trenutno ili u posljednjih godinu dana bio vlasnik poslovnog udjela, dionica odnosno drugih prava na osnovu kojih učestvuje ili je učestvovao u upravljanju, odnosno u kapitalu tog privrednog subjekta sa više od 0,5%.
 - (6) Situacije iz stava (2) ovog člana odnose se i na privredne subjekte koji u nabavci imaju namjeru učestvovati kao članovi grupe ponuđača ili podizvođači.
 - (7) Predstavnikom BH Telecoma u smislu ovoga člana smatra se:
 - a) član uprave, nadzornog odbora, odbora za reviziju BH Telecoma i direktori regionalnih direkcija (dalje u tekstu: ovlaštena lica)
 - b) predsjednik/član/zamjenik člana komisije za nabavku;
 - c) drugi radnik koji je uključen u postupak nabavke ili radnik koji može na bilo koji način uticati na odlučivanje BH Telecoma u postupku nabavke;
 - d) drugi radnik koji učestvuje u pripremi tenderske dokumentacije i radnik koje učestvuje u planiranju nabavke.
 - (8) Odredba stava (2) ovog člana na odgovarajući način se primjenjuje na srodnike po krvi u pravoj liniji ili u pobočnoj liniji do trećeg stepena, srodnike po tazbini do drugog stepena, bračnog ili vanbračnog druga, bez obzira na to da li je brak prestao, te usvojioce i usvojenike predstavnika BH Telecoma iz stava (4) ovog člana.
 - (9) Predstavnik BH Telecoma potpisaoće izjavu ukoliko postoji sukob interesa u konkretnom slučaju.

- (10) Predstavnik BH Telecoma iz stava (4) tač. b), c) i d) ovog člana obavezan je da se odmah po saznanju o postojanju sukoba interesa izuzme iz postupka nabavke i o tome obavijesti svog rukovodioca, a ovlaštena lica iz tačke a) obavještavaju organ koji ih je imenovao.
- (11) O izuzeću ovlaštenog lica BH Telecoma odlučuje organ koji ga je imenovao, odnosno izabrao, a o izuzeću ostalih predstavnika BH Telecoma odlučuje generalni direktor, najkasnije, u roku od osam dana, od dana podnošenja zahtjeva za izuzeće.
- (12) Svaki ponuđač dužan je da uz ponudu dostavi i posebnu izjavu da nije nudio mito niti učestvovao u bilo kakvim radnjama koje za cilj imaju korupciju u predmetnoj nabavci.
- (13) Ugovor o nabavci sklopljen suprotno odredbama ovog člana je ništavan.
- (14) U postupku nabavke ponuđači su dužni da podnesu svoju ponudu bez narušavanja tržišne konkurencije u smislu zabranjenih dogovora sa drugim ponuđačima. U slučaju postojanja osnova sumnje da se u postupku nabavke narušava tržišna konkurencija, zahtjev za pokretanje postupka pred Konkurencijskim vijećem Bosne i Hercegovine može podnijeti svako privredno ili fizičko lice koje za to ima pravni ili ekonomski interes, privredne komore, udruženja poslodavaca ili privrednika, udruženja potrošača.“

Član 3.

U članu 8. stavu (10) na kraju teksta interpunkcijski znak tačka se zamjenjuje kosom crtom i dodaju riječi: „regionalnim direkcijama.“.

Član 4.

U članu 9. stavu (4) Pravilnika iza riječi: „Politike upravljanja dobavljačima“, slovo „i“ se briše i dodaju riječi: „a IDEFP da osigura da u svakoj TD stoji obaveza prihvatanja od strane ponuđača“.

Član 5.

U članu 30. na kraju stava (1) interpunkcijski znak tačka se zamjenjuje zarezom i dodaju riječi: „i mjere za sigurnost obrade ličnih podataka.“

Član 6.

Iza člana 70. dodaje se novi član 70a. (Nabavka usluga naplate potraživanja – ustupanje naplate potraživanja putem posredovanja) koji glasi:“

Član 70a.

(Nabavka usluga naplate potraživanja – ustupanje naplate potraživanja putem posredovanja)

- (1) Društvo za potrebe realizacije naplate dospjelih potraživanja, provodi poseban postupak nabavke usluga naplate potraživanja putem posredovanja sa agencijama za naplatu.
- (2) Ustupanje naplate putem posredovanja odnosi se na:
 - a) potraživanja od korisnika koji su trajno isključeni, tj. kada su iscrpljene sve mjere rane naplate unutar Društva;
 - b) potraživanja po osnovu kojih je pokrenut sudski postupak u skladu sa internim kriterijima za ocjenu nenaplativosti;
 - c) otpisana, a neutužena potraživanja iz prethodnih perioda;
 - d) ostala potraživanja za koja Društvo procijeni potrebu ustupanja naplate potraživanja putem posredovanja;
- (3) Postupak ustupanja putem posredovanja će biti objavljen Javnim pozivom na web stranici Društva. Javni poziv ostaje otvoren kontinuirano, omogućavajući agencijama da se u bilo kojem trenutku prijave i kvalifikuju u skladu sa propisanim uslovima.
- (4) Sa agencijama koje ispune uslove iz javnog poziva zaključuju se okvirni ugovori i ugovori o povjerljivosti. Ugovori se zaključuju na određeni period bez utvrđene finansijske vrijednosti, a realizuju se putem pojedinačnih transfernih instrumenata odnosno naloga za ustupanje koji se smatra ekvivalentom narudžbenice.

- (5) Spisak agencija sa kojima su potpisani okvirni ugovori objavljuje se na web stranici Društva i ažurira se u razumnom roku nakon zaključenja svakog novog okvirnog ugovora
- (6) Na osnovu okvirnih ugovora, Društvo upućuje poziv za dostavu ponuda agencijama sa kojima Društvo ima zaključene ugovore o povjerljivosti i okvirne ugovore, u cilju prikupljanja ponuda za konkretnu listu potraživanja (lot). Pristigle ponude će se u pravilu rangirati na osnovu najniže ponuđene provizije/ekonomski najpovoljnije ponude u slučaju potrebe Društva.
- (7) Transferni instrument predstavlja operativni dokument koji se izdaje agenciji koja ponudi najnižu proviziju/ekonomski najpovoljniju ponudu za datu listu potraživanja (lot).
- (8) Transferni instrument sadrži listu potraživanja, visinu provizije, rokove realizacije i ostale relevantne elemente.
- (9) Provizija se priznaje isključivo za potraživanja koja su stvarno naplaćena i evidentirana na računima/blagajni Društva.
- (10) Agencije za naplatu potraživanja koje ne ispune obaveze iz transfernog instrumenta, povuku ponudu, odbiju potpis transfernog instrumenta ili učine povredu ugovora, mogu biti stavljene na listu nepodobnih ponuđača, u skladu sa članovima 63. i 64. ovog Pravilnika.
- (11) U slučaju da odabrani ponuđač, kojem je dodijeljen transferni instrument, odbije potpisati ili realizovati transferni instrument u ostavljenom roku, Društvo zadržava pravo da, bez ponavljanja postupka, dodijeli transferni instrument sljedećem rangiranom ponuđaču.
- (12) Na sve agencije koje učestvuju u postupku ustupanja naplate potraživanja putem posredovanja primjenjuju se načela sadržana u Kodeksu ponašanja dobavljača, koji je objavljen na službenoj web stranici Društva.
- (13) Uslovi zaštite povjerljivih i ličnih podataka ugovaraju se u okviru ugovora o povjerljivosti i/ili posebnog ugovora o obradi podataka, a u skladu sa važećim zakonodavstvom i internim politikama o zaštiti ličnih podataka.“

Član 7.

Pravilnik o izmjenama i dopunama Pravilnika o nabavkama stupa na snagu osmog dana od dana objavljivanja na oglasnoj ploči u sjedištu Društva.

Broj: 00.1-14-85658/25-2
Sarajevo, 24.09.2025. godine



Pravilnik o izmjenama i dopunama Pravilnika o nabavkama objavljen je dana 26.09.2025. godine (petak) na oglasnoj ploči u sjedištu Dioničkog društva BH Telecom Sarajevo i stupa na snagu dana 04.10.2025. godine (subota).

SEKRETAR DRUŠTVA

Senaid Topuz